



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Transsumpt Römischer Kay. May. vnsers aller gnedigsten  
herren Schütz vnnd Schirmbrieff zu handthabung vnser  
alter wahrer Christlicher vnd Catholischer Religion dem  
hohen Thumbstift/ sambt allgemeiner ...**

**Karl <V., Heiliges Römisches Reich, Kaiser>**

**[Köln], [1545]**

**VD16 D 1128**

Wjr Karll der Fünfft vonn Gotts gnaden Römischer Kayser ...

**urn:nbn:de:hbz:466:1-35063**



## Ir Karll der

Fünffe vonn Gottes gnaden  
Römischer Kayser/ zu allen zeitē  
merer des Reichs/ König in Ger-  
manien/ zu Castilien/ Aragon/  
Leon/ beyder Sicilien/ Iherusa-  
lem/ Hungaren/ Dalmatiē/ Cro-  
atien/ Nauarra/ Granaten/ To-

leten/ Valentz/ Gallicien/ Maionica/ Hispalis/ Sardinie/ Cordu-  
ba/ Corsica/ Murcia/ Siennis/ Algarbien/ Algezierē/ Sibraltar/  
der Canarischen vnd Indianischen Insulen/ vnd der Terre firme  
des Oceanischen Mers/ 2c. Erzhertzog zu Osterreich/ hertzog zu  
Burgundi/ zu Lottrigh/ zu Brabant/ zu Steyr/ zu Kerndten/ zu  
Crain/ zu Lymburg/ zu Lutzempurg/ zu Seldren/ zu Calabrien/  
zu Achen/ zu Neopatrien/ vñ Hirtēberg/ 2c. Graue zu Habsburg/  
zu Flandre/ zu Tirol/ zu Sortz/ zu Barcinon/ zu Arthois/ zu Bur-  
gund/ Phaltzgraue/ zu Henigaw/ zu Hollandt/ zu Seelandt/ zu  
Phiert/ zu Riburg/ zu Namur/ zu Rossilion/ zu Ceritania/ vñnd  
zu Zutphen/ Landtgraue in Elsaß/ Marggraue zu Burggaw/  
zu Gristani/ zu Sociani/ vñnd des hailigenn Römischen Reichs  
fürst zu Schwabern/ Cathalonia/ Asturia/ 2c. Herz in Frieß-  
lande auff der windischenn Marge/ zu Portenaw/ zu Biscata/  
zu Wolin/ zu Salins/ zu Tripoli/ vñnd Wechelenn/ 2c.

Bekennē für vns vñ vnser Nachkomē am Reiche öffentlich mit  
diesem Brieff vnd thun kunch allermenniglich. Das vns die Er-  
samten geleertē/ vnser liebe Vndecktigen/ vnd des Reichs getrewē.  
N. Probst/ Dechant/ vñ Capittel/ deßgleichē Abbt/ vñ Abtissin/  
der hohen vñnd nidern/ Auch anderer beystiffen vnd Gotzhauser/  
vnd gemaine Clerisey/ Deßgleichen Rector vnd Vniuersitet der  
Hohen schulen/ vnserer vñ des hailigē Reichs Stat Cöllē/ sampt  
andern iren Adherentē in vnd außwēdig des Erztiffts Cöln/ ge-  
fessen/ klagweise fürpringen lassen/ vnd zuerkennen gebē/ wie das  
verruckter zeit/ der Erwürdig Herman Erzbischoff zu Cölln/ des  
hailigen Römischen Reichs Erztantzler in Italien/ vnser lieber  
Aene vnd Churfürst/ durch vnzeitigē Rath/ etliche neue Predi-  
canten/ in ietzgemelctē seiner lieb Erztiffte Cöln beruffen vñ auff-  
gestellt/ welche sich bisanher mit embfigē vleiß vnderstandē/ aller-

sey irrige/verfürische leren/vnd newerungē / vnsern altē waren  
Christlichē vnd Catholischē glaubē/vnd Religion/ der Allgemay-  
nen Kyrchē Gottes zuwider in obberürten Ertzstifft einzuführen/  
Vnd dē löblichen hergeprachten Gots dienst/vñ Christliche Cere-  
monie/durch solche ir beschwerliche fürgnomene newerungē vmb  
zustossen vnd zuuerdrucken(wie dann in etliche Stettē vnd orten  
desselbē Ertzstiffts solche newerūg albereit in übung/vñ würckūg  
gefurdert/ Vnd gegē den überigē orten dergleichē zuthun noch nit  
vnderlassen/nach gefeyert wurde) Desgleichē auch gemelter Ertz-  
bischoff ain vermainnt bedencckē Christlicher Reformation gnant/  
darin doch etliche vnd vil punctē/so der Christlichē vñ Catholischē  
Leer vnd Ordnung/gantz vngemeß/vnd widerwertig befundē wur-  
den/fürgnomē/vnd Publicieren lassen. Vnd noch darauff(vnan-  
gesehē irer der Clerisey vnd Vniuersitet/Christlichē vnd Catho-  
lischē gethanē gegenberichts/auch vilfeltigē/diemütigē vermanēs  
vnd flelichē bittens) zu beharren vnderstünde. Vnd wiewol sy die  
Clerisey/vnd Vniuersitet/ von solchē seynem beschwerlichen für-  
nemē/an vns als Römischē Kayser/vnd Oberisten Advocatē der  
Christlichē Kyrchen/appelliert (nach laut ains offen Instrumēts  
vns fürpracht)vnd darauff der Tröstlichē zuuersicht vnd hoffnūg  
gewest/das gemelter Ertzbischoff/In ansehūg solcher irer gethanē  
Appellation/die bemelten predicantē widerumb abgeschaffet/vñ  
die fürgnomen newerungē/vnd vermainnte Reformation/in rube  
gestelt haben. So solle aber nicht destoweniger/seyn lieb/des alles  
vnangesehn/vndersteen/von tag zu tag/ie lenger ie meh:/ mit sol-  
chen fürgnomen newerungen/zutozfarend. Derhalben dan bemel-  
te Clerisey vnd Vniuersitet/sampt iren verwandte/in mercklichē  
sorgen steen muessen/durch bemelten iren Ertzbischoff/vnd etliche  
welliches stands/die seynen lieb in diesem vorhabē anhengig seyn  
möchten/an iren Stifften/Kyrchen/Gotzhäusern/Personen/ ha-  
ben/vnd guetern beschwert zuwerden. Vnd vns darauff als Rō-  
mischen Kayser Oberisten Vogt/handhaber/vnd beschirmer/ der  
hailigen Christlichen Kyrchen/vnd derselbē zugewandten personē/  
diemütiglich angeruffen vnd gebetten/Sy samplich vnd sonder-  
lich in vnsern vnd des Reichs sonderm schutz vñ schirm(souill die-  
se Religion sachen belangt)gnedigst auffzunemē/vñ vor allen be-  
schwerden/so inen derhalb zuzefügen vnderstanden werdē möcht/  
durch gepürlich einsehens zu verthaidingē/vnd inen sonst mit vn-  
ser

ser Kayserlichen hilff hierinnen gnediglich zuerscheinen. Dieweil  
vns nun als Römischen Kayser/ Vogt/ vnd beschirmer der Chri-  
stlichen Kirchen/ in krafft vnser beuolhnen Ampts/ vnd vermöge  
vnserer/ vnd des Reichs Rechten/ Ordnung/ vnd Abscheiden/ ge-  
puert/ vnd justet/ ietzgedachte Christliche Kirchen/ derselbē zuge-  
hörigen/ vnd vnser vñ des Reichs gehorsamen vnderthanen/ Vnd  
fürnemlich die/ so Rechte leiden mögen vnd sulchs bey vns ersuchen  
vnd verfolgen/ auch demselben vñ vnser erkandnuß/ Beuelhen  
vnd Gepoten sich gehorsamlich vndergeben/ Sy dabey zuhandha-  
ben/ zu schutzen/ vnd zu schirmen/ vnd dawider nit beschwerē zu-  
lassen. Zu dem auch in hangender Appellation/ durch niemantz nit  
attentiert werdē solle. Vnd fürnemlich da die Appellantē solchs  
ires Appellierens befuegt zusein vermainen/ vñnd dasselb ordent-  
licher weise außzuführen in übung steen. Demnach haben wir aus  
den erzelten/ vnd andern Redlichen Ursachen/ mit wolbedachtem  
mit/ gutem Ratg/ vñnd Rechten wissen/ die obbemelten Probst/  
Dechant/ Abte/ Abtissin/ Capittel/ Conuenten/ der hohen vnd an-  
derer neben/ vnd niderer Stifte/ Kirchen/ Clöster/ Gotzhauser/ vñ  
gemaine Clerisey/ auch alle vnd iede personen Geistlichen Standes  
in bemelter Statt/ vnd Erztstift Cöln gesessen/ Desgleichen be-  
melte Rectorn vnd Vniuersitet/ sampt allen denen / so inen inn  
dieser sachen/ vnser hailige Religion belangend/ adherieren vnd  
anhangen/ vnd künfftiglich adherieren/ vñnd anhangen werden/  
samplich vñ sonderlich/ souil diese sach berürt/ in vnsern Kayser-  
liche vnd des Reichs sondern verspruch/ schutz vnd schirm genomē.  
Auch vñnd Römischer Kayserlicher macht vollkommenheit erkent  
vnd erkläert/ vñnd thuen das alles hiemit wissenlich in krafft diß  
Brieffe. Also das bemelte Clerisey vnd Vniuersitet / sampt iren  
adherentē/ vnd die/ so inen noch in künfftig zeit adherierē vnd an-  
hangē werden/ vñ ire Nachkomen/ bey berürter vnser alten waren  
Christlichen vnd Catholischen Religion/ Gotzdiensten/ Ceremoni-  
en/ vnd Ordnung algemayner Kirchen/ Auch allen vnd ieglicher  
iren vnd irer Stifften/ Kirchen/ Clöster/ vnd Gotzhauser/ gnadē/  
Freihaiten/ Priuilegien/ Ordnungen/ Satzungen/ Allerkomē/  
gewonhaiten/ vnd gepreuchen/ Desgleichen allen vñnd ieden iren  
haben/ vnd guetern/ Renten/ zinsen/ gülten/ Rechten/ vnd gerecht-  
igkaiten/ durch vns/ vnd sonst meniglich/ gehandthabe/ geschutze  
vnd geschirmt/ vnd derselben aller vnd ieglicher von iemantz nit

enwerdt/entsetze/noch in kein weise dauon gedringē/ oder darin  
turbiert vnd betrübt werden/sonder veruebiglich darbey bleiben/  
sich der aller gebrauchten vnnnd geniessen sollen vnd mögen/von al-  
lermenniglich vnuerhindert. Vnnnd gepieten darauß allen vnnnd  
tegllichen/Churfürsten/Fürsten/ Beystlichen/ vnnnd weltlichen/  
Prelaten/ Grauen/ Freyen/ Herrn/Rittern/ Knechten/ Haupt-  
leuten/Landtuogten/Dietzdomben/Döggen/Pflegern / vorwe-  
fern/Amptleuthen/Schultheissen/Burgermaistern/Richtern/  
Räthen/Burgern/Gemainden/vnnnd sonst allen andern vnsern/  
vnd des Reichs / Auch vnserer Erblichen Furstenthumb / vnnnd  
Landen/vnderthanen/vnnnd getrewen / in was wir den/ stands /  
oder wesens die sein/vnd mit diesem vnserm Brieff ersucht/vnnnd  
ermant werden/Vnd sonderlich gemeltem vnserm Neuen / vnnnd  
Churfürsten/dem Erzbischoff zu Cöln/vnd den weltliche Sten-  
den/Nemlich Grauen/Herrn/Ritterschafft/ Stetten / vnnnd Ge-  
mainer Landschafft beruerets Erztziffes Cölln / von Römischer  
Kayserlicher macht ernstlich vnnnd vestiglich mit dysem Brieff/  
vnnnd wollen/das sy sampelich vnnnd sonderlich/ obgenante Cleri-  
sey/vnnnd Vniuersitet/sampt allen vnnnd teglichen iren adheren-  
ten vnnnd denen/so inen noch in künfftige zeit adherieren vnd an-  
hängen werden/vnnnd ire Nachkommen/bey disen vnsern / vnnnd des  
Reichs sondern verspruch/Schutz/Schirm/erklerung/ ordnung/  
vnnnd satzung / Vnnnd obbemelter vnser waren alten Christlichen  
Religion/Gotzdiensten/Ceremonien/vnnnd Gdnungen/wie die  
in der Catholischer Kirchen / von alters löblich herpracht / vnnnd  
auff vns kommen seindt/ Desgleichen bey allen/ vnd teglichen  
iren vnd irer Stiffte Kirchen/ Clöster/ vnd Gotzhauser/ gnaden/  
Freihaiten/Priuiliegen/Gdnungen/satzungen/alcherkomen/ge-  
wonhaiten/vnd gepreuchen/Auch allen vnd teglichen iren Amp-  
tern/verwaltungen/haben vnd guetern/Renten/Zinsen/gülten/  
gefellen/einkomen/Rechten/vnd gerechtigkeiten / gantzlich vnnnd  
veruebiglich bleiben/Derselben geprauchē/vnd geniessen lassen/  
daran nit hyndern/irren/oder betruenen/ noch das iemandes an-  
dern zuthun gestatten/in kein weise/ Vnd ob hiewider ichts für-  
gnomen worden/oder noch künfftiglich würde/dasselb alles vnnnd  
tedes widerumb Cassieren/ abschaffen/vnd in vorigen stande setze/  
dem allem gehorsamlich nachkommen/vnd geleben/ vnd kein an-  
ders thuen/Alles bey vermeydung vnserer / vnd des Reichs schwe-  
ren

ren vngnad/straff/ Auch verlierung aller irer Regalien/ Lehens-  
schafften/begnadungen/Priuiliegen/vnnd Freihaiten/die sy von  
vnsern Vorfaren am Reich/Römischen Kaysern vnd Königen/  
vns vnnd dem hailigen Reiche bekommen vnd inhabē/ Vnd vnser  
vnnd des Reichs Acht vnd Alberacht/darein ain ieder/so freuent-  
lich hiewider thun/oder sich hierinn vngheorsam erzeigen wurde/  
mit der that gefallen sein/vnd gegen dem/oder den selben/als vn-  
sern vnd des Reichs vngheorsamen verprechern vnseres Kayserliche  
Schutz vnd Schirms/von menniglich gehandelt vnnd verfarent  
werden solle. Vnnd damit diser vnser Kayserlicher Schutz vnnd  
Schirmb/wie sich gepurt/würcklich volnzogen werde/ So haben  
wir mit wolbedachtem mit/gutem Rath/ vnd Rechter wissen/  
alle vnnd iede Churfürsten/ Fürsten/geystlich vnnd wellich/  
Bielatē/Brauen/Freyen/Herrn/Rittern/Knechte/Almptleuthe/  
Schulthaisen/Burgermaister/Richter/Räthe/Burger/vnd ge-  
mainden/Vnd sonst alle vnnd iede vnserer vnd des hailigē Reichs  
vnderthanen ietziige vnd künfftige/samplich vnd sonderlich/wel-  
cher oder welche aus inen derhalben ersücht werdē/Zu vnsern son-  
dern Conservatoren/Executores/vnd handhabern/dieses vnseres  
Kayserlichen Schutz vnd Schirms gesetzt vnd verordnet/Setzen  
vnd ordnen die also samplich vnd sonderlich/von obberuerter Rö-  
mischer Kayserlicher macht vollkommehait/in krafft diß Brieffs/  
Denselben allen ernstlich gepietendē/vnnd wollen/das sy samp-  
t vnd ain ieglicher aus inen/gemelte Clerisey/Uniuersitet vnd ire  
Adherenten/vnnd die so inen hernach anhangen werden/vnnd  
ainen ieden aus inen bey dysem vnserm Kayserlichen Schutz vnd  
Schirmbrieff/vnnd aller desselben inhaltung/gegen meniglich/  
so offte sy darumb samplich oder sonderlich ersücht/oder des für-  
sich selbs innen werden/in vnserm namen/von vnser vnnd des  
Reichs wegen getrewlich/Schutzen/Schirmen/handhaben/  
verchedingen/vnnd inen behilfflich seien/Damit sy dawider nit  
vergwaltigt/beschedit/nach beschwert werden. Vnd ob iemantz/  
wes wurden/stands/oder wesens der were/obgemelte Clerisey/  
Uniuersitet/vnnd ire anhangen beruerter sachen/gegenwürtige  
vnnd künfftige/gemainlich oder in sonderheit dawider beköm-  
berte/vergwaltigte/oder beschwerdte/Alßdan denselben kaine zu-  
legung/oder enthaltüg thuen/nach gelait/oder sicherhait gebē/son-  
der gegē denselben übertretern vnd vngheorsamē/ vmb obberürte  
vnd

vnd andere Peen / vnd wirkliche Execution vnd volziehung  
 derselben fürnehmen / handeln vnd procedieren / wie sich gepuert /  
 in aller massen als wir selbs thuen möchten / Vnd als lieb inen  
 seye vnser / vnd des Reichs schwere vngnad vnd Straff zu-  
 uermeyden / Daran sy auch ainiche vnserer Dorfarn / oder vnserer  
 Satzung / Ordnung / Priuilegien / oder Freyhaiten / noch ainige  
 gewonhaiten / so hiewider seyn / oder verstanden werden möchten /  
 nit hyndern / oder auffhalten sollen. Vnd nachdem dieser vnser  
 Schirmbrieff / nit an alle ort / da sollichs villiche die notturfft er-  
 fordern / gepracht werden mag / So wollen wir / das desselbigennit  
 Transsumpten / Vidimus / oder abschrieffen / vnder ains ieden  
 gaislichen / oder weltlichen Richters / oder Gerichtes insiegel / ver-  
 fertigt / oder durch ain offenbaren Notarien / inn beysein zweyer  
 glaubwürdiger zeugen aufsculiere / vnd mit seynem handtzeichen  
 vnderzeichnet / gleich diesem Originalbrieff allenthalben / in vnd  
 ausserhalb Gerichtes geglaubt werden soll. Mit vnkunt diß Brieffs /  
 besiegele mit vnserm Kayserlichen anhangenden insiegel. Gebert  
 in vnser vnd des Reichs Statte Wormbs am Sibendzwayntzi-  
 gisten tag des Monats Junij. Nach Christi vnser lieben Herrn  
 geburt Funffzehnhundert / vnd im Funffundviertzigisten /  
 Vnser Kayserthumbs im Funffundzwayntzi-  
 gisten / vnd vnserer Reiche im dreyssi-  
 gisten iaren.

Carolus.

VOCar. <sup>nus</sup> Aug.

V Naues.

Admandatum Casar  
 rea & Catholica Ma  
 ie. Statu proprium.

Obernburger St.